

10 Februari 2011

Keganasan Masih Ancaman Utama Keselamatan A.S.

Oleh Merle David Kellerhals Jr

Penulis Staf



Washington - Pegawai perisikan AS berkata bahawa keganasan terus menjadi ancaman terbesar Amerika Syarikat, walaupun ancaman utama dari kumpulan penganas Al-Qaeda telah dilemahkan.

“Kami sudah menangkap ramai aktor berbahaya di seluruh dunia dan melemahkan kemampuan teras al-Qaeda, termasuk latihan, operasi dan propagandanya,” kata Pengarah Perisikan Nasional James Clapper di sidang dengar kongres pada 10

Februari.

Clapper juga menerangkan bahawa tujuan utama al-Qaeda menyerang Barat tidak berubah, walaupun operasi kumpulan itu dapat dilemahkan.

Pengarah Perisikan Nasional James Clapper memberi keterangan di hadapan jawatankuasa kongres mengenai ancaman-ancaman di seluruh dunia.

Menghentikan serangan penganas al-Qaeda dan melemahkan ancaman daripada kumpulan-kumpulan lain memerlukan penglibatan aktif agensi perisikan dan agensi penguatkuasaan undang-undang banyak negara lain sejak serangan pada 11 September 2001, kata Clapper.

Testimoni beliau merupakan sebahagian daripada sidang dengar yang diadakan oleh Jawatankuasa Perisikan Dewan Perwakilan A.S. untuk mengkaji semula laporan penilaian tahunan ancaman oleh komuniti perisikan A.S.

“Pencegahan keganasan adalah penting bagi operasi luar negara kami, terutama di Afghanistan,” kata Clapper. “Walaupun usaha kita mengganggu, menghapus dan mengalahkan al-Qaeda sesuatu yang sukar dimenangi, kita telah melihat dan akan terus melihat kejayaan dalam tadbir urus, keselamatan dan pembangunan ekonomi yang akan mengurangkan sokongan orang-orang Afghanistan kepada Taliban dan sekutu al-Qaeda mereka.”

Pengerusi Perisikan Dewan Mike Rogers mengatakan bahawa sebagai pengawas komuniti perisikan negara, jawatankuasa mengakui bahawa komuniti perisikan sangat penting untuk membantu melindungi negara daripada pelbagai ancaman di seluruh dunia. “Tugas kita di sini, di Kongres, adalah untuk memastikan bahawa badan-badan perisikan kita mempunyai peralatan dan kuasa yang mereka perlukan,” tambah Rogers.

Komuniti perisikan AS termasuk badan-badan perisikan awam dan tentera, seperti Agensi Perisik Pusat dan Biro Siasatan Persekutuan, yang ditugaskan untuk mengumpulkan maklumat dan melaksanakan misi untuk menggagalkan ancaman dan melindungi negara dan warga negara Amerika.

Selain ancaman yang ditimbulkan oleh keganasan di Amerika Syarikat dan di seluruh dunia, kebimbangan lain adalah perebakan senjata pemusnah besar-besaran, Clapper memberitahu jawatankuasa Dewan. “Ancaman perebakan senjata adalah ancaman yang tidak mengira sempadan yang mencerminkan realiti global yang lebih luas mengenai pergerakan manusia, barang dan maklumat yang semakin bebas,” katanya.

Clapper menyatakan bahawa Iran merupakan cabaran utama kerana apa yang beliau gambarkan sebagai pertemuan peristiwa-peristiwa yang luar biasa - iaitu satu pemerintahan yang semakin ketat, autokratik dan mencabar Barat untuk terus membangunkan kemampuan senjata nuklear.

“Senjata nuklear Korea Utara dan program-program peluru berpandu juga menimbulkan ancaman serius, baik di peringkat serantau mahupun antarabangsa,” kata Clapper.

Clapper berkata Amerika Syarikat berada pada zaman di mana dunia saling berkaitan dan bergantungan dan ketidakstabilan di antara negara-negara boleh muncul dan tersebar dengan cepat melepas sempadan, seperti yang disaksikan di beberapa bahagian Timur Tengah dan Afrika Utara - khususnya, di Tunisia dan di Mesir. Perkara ini tetap merupakan cabaran bagi komuniti perisikan AS untuk dapat mengesan dan melaporkan peristiwa-peristiwa seperti ini, katanya.

Perkara-perkara yang menjadi kebimbangan komuniti perisikan yang disebut Clapper termasuk ancaman siber, pencurian harta intelektual, rusuhan awam disebabkan ekonomi, jenayah antarabangsa terancang, keselamatan tenaga, perdagangan dadah dan kemunculan penyakit.